



Unser Gaarde.

Wie Laudere noch kläher,
Do hammer vor de Schdadt
Draus, wie so mancher ähner,
E Gaarde aah gehadd;
Mit Gummere un Bohne,
Schwarzworzle un Salaad
Selbschd Kirbis un Melone
Hammer gehadd — e Schdaad.

Vorn waren die Rawadde
Vor Zwiwle un Gemies,
Un hinne dann im Schadde
Die Erbeere, so sieß.
Un längs de Pädcher schdehe
Gehannß- un Gruschelschdeck
Un Himbeere un Schlehe
Un lauder so Geschleck.

Um Enn vum Bädche unne
Do schdehd es Gaardehaus,
Un newedra" de Brunne,
Es kummd aah Wasser raus — —
Zwar muschd e halb Schdunn bumble,
Um ebbes raus se krieh
Un dann wars nor e Schdumbe
Un roo un gääl un grie.

E schlechder Buvemaage,
Der nooh so ebbes frooht —
So hammers mit Behage
Gedrunk un war's aah rood;
Loßd bei dem Durchenanner
De Maage die Geduld,
War eher alles Anner
Als Obst un Wasser schuld.

Un erschd dann unser Blumme —
Waß war ich do so schdolz,
Als in die Schul mit kumme:
Eije Gewächs un Holz;
„Badduljeros“, „Kefedde“,
„'s Grerel hinner de Heck“



Do war nix mäh se redde,
De Lehrer war e wegg.

Die Zeide un die Fahrde,
Wie leißen se so fern;
Wo frieher unser Gaarde,
Schdeht jезд e Miedskasern.
Vedschd geh' ich mol vorriwmer
Un hammer's so bedrachd,
Die Aue gehn mer iwwer
Un doch hann ich gelachd.

Gelachd, wann ich der Aⁿschläh
All denf', die uns sinn kumm,
Gegreind, wo ich jезд dra" schdeh
Un steh: 's iß alles rum!
Es siehn die Leid verwunnerd
Mer noh: Der schbinnd gewiß!
Es wääs jo unner hunnerd
Raam ähner, wie mer's iß.

